

CAROLVS MAGNVS I. IMPERATOR GERMANORVM.



Arolus natus est in Ingelheim celebri loco Germaniæ, duobus millibus passuum à Moguntia distans, ubi postea insigne palatium extruxit, cuius uestigia etiã hodie cernuntur. Patrem habuit Pipinum illustrem regem Francorũ, qui regis Hilderici ultimi ex gente Merouingorum præfectus Palatiĩ prius erat. is uerò eo tempore Maior domus dicebatur, ad quẽ summa Imperiĩ spectabat, cum reges præter inane titulum & personam, crine atq; barba uestitam, in folio residentem & legatos audientem, nihil reliqui haberẽt. tandem etiã Hilderico in monasterium detruso, iussu Stephani pontificis, omnium

consensu rex electus. matrem uerò Bertham, quæ filia erat Heraclij Constantinopolitani Cæsaris. A pueris omni genere literarum optimè institutus fuit. liberales enim artes studiosissimè coluit, atq; doctos unicè dilexit, & magnis affecit honoribus. Primò usus præceptore Petro Pisano sene Diacono in Latinæ & Græcæ linguæ Grammaticis. in reliquis uerò artibus, utpote Dialectica, Rhetorica, & Mathematica ipsum Albinum, qui Alcuini cognomen tulit. is erat natione Anglus, atq; quondam uenerabilis Bedæ auditor, uir longè doctissimus, id quod etiãnum opuscula ab eo conscripta & ædita testantur.